

Inuussutissanik allagartalersuisarneq pillugu Namminersornerullutik Oqartussat nalunaarutaanni nr. 1-mi, 2. februar 1994-imeersumi § 11 imm. 2 nummer 1-p allangorteqqullugu Naalakkersuisut peqquneqarnissaanik Inatsisartut aalajangiiffigisassaattut siunnersuut, nalunaaqutsersuisarneq aamma tuluttut pisinnaangortillugu.

Inatsisartunut ilaasortaq Steen Lyngemit, Demokraatit saqqummiunneqartoq

pillugu

Inuussutissarsiornermut Aatsitassanullu Ataatsimiititaliap

siunnersuutip aappassaaneerneqarneranut

ISUMALIUTISSIISUTAA

Ataatsimiititaliap kingullermik suliarinninnermini ilaasortarai:

Inatsisartunut ilaasortaq, Jens Danielsen, Siumut, Siulittaasoq
Inatsisartunut ilaasortaq, Múte Bourup Egede, Inuit Ataqtigiit, Siulittaasup tullia
Inatsisartunut ilaasortaq, Mala Høj Kuko Siumut
Inatsisartunut ilaasortaq, Henrik Fleischer; Siumut
Inatsisartunut ilaasortaq, Randi Vestergaard Evaldsen, Demokraatit
Inatsisartunut ilaasortaq, Tillie Martinussen, Suleqatigiissitsisut
Inatsisartunut ilaasortaq, Peter Olsen, Inuit Ataqtigiit

Ulloq 5. november siullermeerinninnerup kingorna ataatsimiititaliap siunnersuut misissorpaa.

Siunnersuutip imarisai siunertaalu

Inuussutissanik allagartalersuisarneq pillugu Namminersornerullutik Oqartussat nalunaarutaanni nr. 1-mi, 2. februar 1994-imeersumi § 11 imm. 2 nr. 1-i allangorteqqullugu Naalakkersuisut peqquneqarnerat siunnersuutip nassatarissavaa, taamaalillugu allagartalersuisarneq aamma tuluttut pisinnaangortillugu.

Nalunaarummik allanngineq nunanit allanit eqqussuinnermik ajornarunnaarnerulersitsilluni unammilleqatigiinnermik annertunerulersitsissasoq siunnersuuteqartumit tunngavilersuutigineqarpoq, tassuunakkullu nunatsinni inuussutissanik pisinermi akitigut aningaasartuutinik apparsaaqataalluni.

1. siunnersuutip Inatsisartuni siullermeerneqarnera

Siunnersuummut ilaannakortumik tapersiisoqarpoq. Ikinnerussuteqartut Demokraatineersut, Partii Naleqqameersut, Atassummeersut kiisalu Nunatta Qitornaanersut siunnersuutip akuersissutigineqarnissaa inassutigaa. Akerlianik amerlanerussuteqartut Siumumeersut, Inuit Ataqtigiiinersut kiisalu Suleqatigiissitsisuneersut Naalakkersuisunit allannguutissatut siunnersuut ataaniittoq taperserlugu ersersippaat:

Inatsisartut aalajangiiffigisassaattut siunnersuut Inuussutissanik allagartalersuisarneq pillugu Namminersornerullutik Oqartussat nalunaarutaannik nr. 1, ulloq 2. februar 1994 - imeersumik nutarterinerminnut atatillugu Naalakkersuisut misissussagaat inuussutissanik allagartalersuisarnermi inuussutissat aamma tuluttut allagartalerneqartalersinnaanersut.

Ataatsimiititaliap siunnersuummik suliarinninnera

Inuussutissanik allagartalersuisarneq pillugu Namminersornerullutik Oqartussat nalunaarutaat nr. 1, 2. februar 1994-imeersumi ima allassimasoqarpoq:

§ 11. Nalunaarut una naapertorlugu allagartaliussat

1) atuaruminartuussapput,

2) ersarillutik aammalu

3) piiarneqarsinnaanatik.

Imm. 2. Taamatuttaaq kapitalit 4-miit 9-mut naapertorlugit allagartalersuutit

1) kalaallisut imaluunniit qallunaatut imaluunniit allamiut oqaasiisut, annikitsuinnarmik allattaatsikkut qallunaatuumit allaaneruusut, allassimassapput, aammalu

2) saqqumilluartumi ikkunneqarsimassallutik.

Imm. 3. Nioqqutissap suussusianik, aalakoornartortaqaassusianik, puua ilanngunnagu

annertussusianik piunertussusianillu paasissutissat isikkivimmi ataatsimi allassimassapput.

Nioqqutissap imarisai, inuussutissartai, pisoqaliffissaa suminngaaneerfialu pillugit paasissutissanik pisariaqartunik atuisartup qulakkeerissunneqarnissaa allagartalersuinissamik piumasaaqammik siunertaavoq. Tamanna assersuutigalugu atuisartut inuussutissartanik, naalakkersuinikkut pissutsinik imaluunniit uumasut atugarissaartuunerannik ilisimanninnissamik "pingaartitsinermik" pissuteqartumik nioqqutissap akui nioqqutissiortorlu pillugit paasissutissanik ujartuisut eqqarsaatigalugit – kiisalu peqqinnissakkut mianersuutassat eqqarsaatigalugit, tassami atuisut ataasiakkaat, akuutissanik aalajangersimasunik pinaveersaarisariaqartitsisumik sapigaqartuusinnaapput.

Oqaatigineqareersutut – kalaallisut, danskisut imaluunniit oqaatsit allat danskit oqaasiinit allaaneruallaanngitsut atorlugit allagartalersuisoqassaaq.

Danskit oqaasii atorlugit oqaatsit allat atorlugit allagartalersuinerup akuerineqarsinnaaneraniq naliliinermi qanoq allagartalersuutit atuisumut paasiuminartiginera pisuni ataasiakkaani isummerfigineqartariaqarpoq. Tassa svenskisut norskisulluunniit allagartalersuutit danskisut allagartalersuummut taarsiullugu atorineqarsinnaanera naatsorsuutiguaannarneqarsinnaanngilaq, soorluttaaq allamiut oqaasii allat atorlugit allagartalersuinerup atorineqarsinnaanera mattunneqarsinnaanngitsoq.¹

(Issuagaq Inatsisartut Allattoqarfianni nutserisumit nutserneqarpoq).

Tassunga atatillugu ataatsimiititaliamit oqaatigineqartariaqarpoq Kalaallit Nunaanni nalinginnaasumik oqaatsitigut piginnaasaqarneq assigiinngisitaqaaq pingaartumillu tuluttut piginnaasaqassuseq assigiinngisitaqaluni.

Tamanna pissutigalugu nioqqutissat tuluttut allagartalersorneqarpata innuttaasut ilarpassuisa allagartalersuutiniq atuisinnaanermut mattunneqarsinnaanerat ataatsimiititaliamit isumakulunnartinneqarsinnaavoq. Inuussutissalli ilaasa (soorlu naatitat) naatitaanertik pissutigalugu ajoqutaanngitsumik tuluttut allagartalersorneqarsinnaaneri ataatsimiititaliamit mattunneqanngilaq.

Tamatumani ataatsimiititaliap maluginiarpa siullermeerinninnermi siunnersuuteqartup siunnersuummik tunngaviumik siunertanut tapersiisoqaqisoq, taamaalillunilu qanoq nalunaarutip siumut kingunissat pillugit misissueqqaarluni imaluunniit misissueqqaarani allanngortinneqarnissaa avissaarutituaalluni.

Ataatsimiititaliap isumaa malillugu akissutissaq ataasiinnaavoq. Qanoq tuluit oqaasiinik atuinerup siunertarineqanngikkaluaniq kinguneqarsinnaanera pillugu misissuisoqartinnagu oqaasertalersuinerumi oqaatsinik atorineqartuninik allannguisoqartariaqanngilaq. Taamaalilluni allagartalersuinerup qaqugukkulluunniit atuisartumit paasiuminartuunerata qulakkeerneqarnissaa anguniagaasariaqarpoq.

Siunnersuuteqartulli unammillernerup annertusineratigut akit appartinneqarnissaannik anguniagaa ataatsimiititaliamit tapersernartinneqarpoq, taamaammallu akissuteqaammi imatut allassimasoqarnera iluarisimaarlugu maluginiarneqarluni:

Naalakkersuisut siunnersuuteqartutulli kissaatigaat nioqqutissat atorfissaqartinneqartut, tamatumani aamma inuussutissat sapinngisamik nunatsinni akikitsuunissaat. Taamaattumillu aamma Naalakkersuisut isiginiarniarpaat periarfissat assigiinngitsut, nioqqutissat akiinik appaasinnaanermut tunngatillugu, atuisartunit nioqqutissat atorineqarnerusut eqqarsaatigalugit.

¹ Inuussutissat allagartalersorneqartarnerat pillugu ilitsersuut (*Vejledning om mærkning af fødevarer*) (qup. 13). Fødevarestyrelsen. Maj 2018.

Kiisalu:

Naalackersuisut piareersimaffigaat periarfissat isiginiarnissaat, siuliani eqqaaneqartut isiginiagassat naammassineqarnissaannut tunngatillugu, immikkut piumasaaqateqanngikkaluarluni poortuutaasup / nioqqutissap kalaallisut imaluunniit skandinaviamiusut allagartaqarnissaamik..

Ataatsimiititaliap tassunga atatillugu naggasiutigalugu inassutigiinnarumavaa, tuluit oqaasiisa allagartalersuinermi atorineqarsinnaanerit pillugu nalilersuinermit atuisartunit aallartitanik peqataatitsisoqassasoq.

Siunnersuutip aningaasaqarnikkut kingussai

Inatsisartut suleriaasianni § 33, imm. 1, malillugu aalajangiiffigisassat siunnersuutip piviusunngortinneqarnerani aningaasaqarnikkut allaffissornikkullu kingunissat siunnersuummut tunngavilersuutini allaaserineqassaaq. Siunnersuuteqartup tamanna naapertorlugu allassimavaa nalunaarummik allannguineq AC-mut ukiumut akissarsiaritinneqartut sisamararterutaat sinnernagit atorlugit naammassineqarsinnaasut nalilerneqartoq, Naalackersuisut tamatuminnga assortuinissamut tunngavissarsisimangillat.


Naalackersuisunit allannguutissat siunnersuummut tunngatillugu, nalunaarummik nutarterinerup aallartinneqareersup ilaatut allannguutissat siunnersuut ilanngunneqarniarloq akissuteqaammi nassuiaatigineqarpoq. Taamaammat allannguutissat siunnersuut saniatigut allanik aningaasartuuteqarnermik nassataqassasorineqanngilaq.

Ataatsimiititaliap inassuteqaatai

Ataatsimiititaliami **amerlanerussuteqartut** Inuit Ataqatigiinnit, Suleqatigiissitsisunit Siumumiillu ilaasortaatat Naalackersuisut allannguutissat siunnersuutaata **akuersissutigineqarnissaa** inassutigaat.

Ataatsimiititaliami **ikinnerussuteqartup** Demokraatinit ilaasortaatat Naalackersuisut allannguutissat siunnersuutaata **itigartitsissutigineqarnissa** inassutigaa.

Ataatsimiititaliap taama oqaaseqaateqarluni isumaliutissiisummilu allassimasutut paasinnilluni siunnersuut aappasaaniigassanngortippaa.




Jens Danielsen,
Siulittaasoq



Múte B. Egede



Mala H. Kúko



Randi V. Evaldsen



Henrik Fleischer



Peter Olsen



Tillie Martinussen